

Der irrt gar dick vff ebner stroß
Vnd furt sich inn eyn wiltniß groß
Das er nit licht kumbt wyder heyn/
We dem der velt/ vnd ist alleyn
Zu karger synt vil worden offt
Sie woltten nit/ das man sie strofft
Verlossend sich vff eygne kunst
Das sie eruolgtent rûm vnd gunst
Vil narren syelen ettwann hoch
Sie stygen vogelnâster noch
Vnd suchten wâg/ do keyner was
On leytter mancher nyder saß
Verachtung dick den boden rürt
Vermessenheyt vil schiff verfür
Nyemer erfolgt nutz noch ere
Wer nit mag han/ das man in lere
Sie welt wolt Noe hören nye
Bis vndergingen lût vnd vieh/
Chore wolt dîn das im nit zam
Dar vmb er mit sym volck vmb kam
Das sunder thier das frist gar vil
Wer eygens koppfs sich bruchen will/
Der selb zertrennen vnderstat
Den rock gar offt/ der do ist on nat
Wer hofft dem narren schiff entgan
Der muß des wachs inn oren han
Das brucht Vlisses vff dem mer
So er sach der Syrenen her
Vnd er durch wißheyt von inn kam
So mit eyn end jr hochfart nam

